

# Muossar tuot la sporta da sandà

**In sonda han drivi l'Ospidal e la Clinica curativa a Scuol las portas pella populaziun. Raduond 1000 persunas sun seguidas a l'invid ed han visità «lur» Center da sandà. Eir la Regenza grischuna ha manà salüds e blers lods.**

NICOLO BASS

Il Center da sandà Engiadina Bassa (CSEB) vala daper tuot sco proget da pilot e vain suvent lodà da tuot las varts. Uscchè eir in sonda in occasiun dal di da las portas avertas da l'Ospidal e da la Clinica Curativa a Scuol. Var 1000 persunas sun seguidas a l'invid ed han visità «lur» ospidal e «lur» Clinica Curativa a Scuol. Il cusglier guvernativ Peter Peyer ha lodà l'iniziativa e l'ingaschament in Engiadina Bassa pel provedimaint da sandà e naturalmaing pel Center da sandà Engiadina Bassa. «Cul Center da sandà ha l'Engiadina Bassa fat las lezchas», ha' declerà ed el ha rendü attent cha quai nun es in tuot las regiuns dal Grischun il cas. Eir il directer dal CSEB Joachim Koppenberg s'ha cloccà s'vess süllas spadlas ed el ha fat valair, cha in Svizra sun svidas ils ultims 20 ons passa 100 ospitals e clinics causa las structures ed ils problems finansials. Il CSEB invezza ha surgni ils ultims ons differents premis d'innovaziun e da qualità e dafatta il Viktor Award per seis provedimaint da sandà.

## Grondas sfidas per l'avegnir

Però i nun es tuot or quai chi glüscha. Quai san eir Joachim Koppenberg ed il president dal cussagl da fundaziun dal CSEB Philipp Gunzinger. Ch'üna regiun pitschna e periferica cun be 9000 abitants ed abitants haja ün provedimaint da sandà chi funcziuna bain nu saja evidaint. Chi saja da star landervia e chattar cuntinuadamaing novas soluziuns ed innovaziuns per tgnair l'avantag invers otras regiuns ed instituziuns. Quai conferma eir il directer dal CSEB Joachim Koppenberg. Per exam-

pel il nouv concept da meidi d'urgenza chi vala a partir dals 1. settember per tuot la regiun e dafatta sur cunfin. Ils responsabels spordschan nempe transitoricamaing il servezzan da prüm agüd e da meidi d'urgenza eir per Danuder in Austria. Eir finanzialmaing resta il provedimaint da sandà üna gronda sfida. Perquai esa tenor Joachim Koppenberg fich important, cha las indigenas ed ils indigens nu dovran «lur» ospidal be in cas d'urgenza, ma eir per oters trat-

taments ed operaziuns planisablas. Koppenberg conguala perquai la sporta da sandà cun üna butia da cumün. «Na be cumprar quai chi's dovra necessariamaing e chi's ha invlidà, dimpersè cumprar adüna illa butia in cumün», ha' dit.

## Nouv concept da meidi d'urgenza

Eir perquai esa pels responsabels stat fich important da preschantar in sonda passada davo tschinch ons darcheu

üna jada la «butia» da sandà in Engiadina Bassa. Las visitaduras ed ils visitadurs han pudü visitar tuot las partiziuns da l'Ospidal e da la Clinica Curativa a Scuol. Ils responsabels han muossà eir ils differents mansters e las pussibilitats da scolaziun suot il tet dal CSEB. Eir tuot il servezzan da salvamaint, dal nouv veicul dal meidi d'urgenza fin pro la Rega, es gnü preschantà in sonda. Preschainta d'eira eir la gruppa da «first-responder» dal salva-

maint alpin e la Società «Amias ed amis da l'Ospidal Engiadina Bassa». Cun musica e trategnimaint han las visitaduras ed ils visitadurs eir pudü gjo-dair differents trats culinarics da l'Ospidal a Scuol. Il directer dal CSEB Joachim Koppenberg ha finalmaing trat ün facit positiv da tuot l'arrandschamaint ed el ha suottastrichà l'importanza da pudair muossar tuot la sporta da l'Ospidal e da la Clinica Curativa a la populaziun indigena.



Eir il cusglier guvernativ Peter Peyer ha visità in sonda l'Ospidal e la Clinica Curativa a Scuol ed el ha lodà a la populaziun ed als responsabels dal Center da sandà Engiadina Bassa pel provedimaint da sandà in Engiadina Bassa. La Rega e la Musica da Tschlin han inramà la festa. fotografias: Mayk Wendt/Nicolo Bass